

摛藻堂四庫全書薈要

集部

欽定四庫全書薈要

集部

震澤集卷二十七
八

詳校官候補通野經歷臣郭祚熾



欽定四庫全書薈要卷一萬六千八百四十三

集部

震澤集卷二十七

明 王鏊 撰

誌銘

右春坊諭德劉君墓誌銘

弘治五年八月二十日右春坊右諭德劉君景元卒于京師子榮應舉江西孺人胡氏與二孫曉暕以其喪歸江西之安成明年正月七日葬廬陵之梅華塢年五十

有八劉故安成鉅族君祖東匯父丕嚴贈翰林編修母

趙氏封太孺人君諱戩景元字生穎脫超邁日記數十

言年二十一占江西鄉試會試屢不第入太學爲文章

宏深瑰絕聲華振起名士景附每一下第物論稱屈主

試者每以不得君爲歎年四十始與予同登乙未會試

廷試第二人及第授翰林院編修九年進侍講預修憲

廟實錄成進今官上之初即位也例遣近臣使外國時

安南吞占城侵緬甸外恭內驚衆謂非剛方才辯者不

任是行君時以侍講爲正使先是使外國者多治巨艦
載重貨浮海與其國爲市穀接艫銜或與陪臣賡和誇
竒角捷以爲才君考地志陸道南寧逕甚無虞乃乘肩
輿從兩僮忽抵其界夷人傾駭郊迎館候視舊虔甚陪
臣拜跪立受之不與交一語至之日頒詔明日讌讌畢
遂行國王恐竦至曰一國生靈命縣天使金珠犀象餽
貽錯落一不顧王復遣人追授諸途不與語獸書其入
關詩與之曰歸裝有一南物者關神其殛諸其後安南

遣使入謝表有廷臣清白之語出使時賜麒麟服寶錄
成又有白金文綺之賜君博學無不闕多識本朝典故
嫉邪守正氣豪論卓遇事直前意見捷出喜面斥人短
長旁聞縮愬君色自若尤精人倫識鑒見表洞裏分割
參停十不失一權門勢家庭無行跡高亢特立與世寡
合而歎與予善也予出則詣君君出則詣予見則相與
劇談兩相忘而罷及病草予往省之氣犇上僅屬予爲
悽惋君曰自古有不死者乎吾已後顏子矣病間復語

國事會劉文穆罷壽寧侯卒君時不能言矣忻然索筆
爲詩有天畱老眼待三月之句命其弟戡曰乞濟之銘
予還自南畿考試至臨清遇其喪哭之以詩於戲若君
非古所謂直諫多聞之益友乎予方賴焉振吾過策吾
昏以終吾身庶有益乎而君弃予死矣銘曰

剛吾未見聖所歎去之千載茲唯艱安成水激山孱顏
是生夫子勇且仁口持公議立詞垣別白白黑不肖賢
誰云不用用未殫直辭一吐十糾蟠世方疾走行獸跚

辭喧得靜非所患嶢嶢齧齧驚髦鬢謂方耄耄胡不延
後懷遺直表茲阡

陸處士墓誌銘

處士陸姓諱俊字伯良古顏古心古衣冠治家居鄉出
詞行事世多迂之而予特愛其近古也年八十有四以
弘治五年二月十二日癸丑卒十一月甲申祔葬蔣塢
之先塋處士予叔祖行也幼特受知焉今還不及見也
爲文祭之且志其墓陸氏爲馬甲處士悉馬甲之害也

將疏以聞大意以北人習馬南人習船南人爲馬甲太宗權時之制耳今宜南北各復其舊便又言吳下官田稅十民田稅一均之則國用不虧民不困又言錢久不鑄且竭宜復五銖備一代制又言州縣官剋下宜多設官相監制又言鹽法急盜滋多弛其禁盜將自息其書凡數千言其草數謄易無問寒暑晝夜行坐寢飯得一字輒起易之欣欣告人意以爲必可行也始以干當道當道若不聞已乃不問貴賤賢愚遇人輒授之又榜於

道路市肆曰庶有見而行之者積三十餘年費紙筆如
山人或信或笑或以黏壁淨几處士終不廢也予間謂
曰何爲紛紛翁家所苦者馬役吾能言於官而免之處
士曰君豈爲我設哉吾以爲天下也吾家固自宜役其
志公其念深其自信篤於戲使世之在位者皆有是心
國事其有隳乎吾又以悲處士之不遇也處士類寬厚
而治家甚嚴嘗曰壞人家者臧獲也故陸氏雖富有傭
無奴私鹽升合不得入戶年八十以詔恩授冠帶然家

常罕御曰吾自宜山林之服也此固世之所謂迂者乎
豈所謂古者多近於迂乎其平生精力具焉役書故特
詳焉配周氏與處士合德卒亦年八十四子男二長均
顯蚤死次均昂克世其家孫男二曰豸曰豸豸爲郡庠生
銘曰
孰謂丘壑國憂是瘁飽食優游媿爾有位

靜菴處士墓誌銘

西洞庭處士徐君諱震字德重年七十則作壽藏於山

之富子岡曰吾將歸矣又八年爲弘治三年九月二十四日卒六年月日乃克葬焉徐爲洞庭鉅族而家世好文處士生長湖山神清抱潔少從陳太史嗣初學詩太史亟稱之既又與其兄德彰日相劇切學益進有弔項羽廟睢陽懷古輓岳武穆諸詩傳播人間久之謝賓客歸山中日焚香垂簾雖鄰里無行跡而詩終不廢也先娶鄒氏再娶顧氏子男四淮濼濂潮孫男八數十年來詩法稍變類以雄渾沉實爲高晚生初學模擬竄竊割

裂釘餽以爲竒而處士日藏深山賦詩止以自娛往往
世不復知有處士矣然唐人高風絕塵其復可見乎若
處士其猶近也孫縉王氏壻故予爲銘銘曰

通世營營匪利伊名學追時好與世角爭洵美徐君遐
騫高揭孰知我吟谿雲山月湖山峯峯湖水瀰瀰我懷
其人不在於詩

封奉直大夫右春坊右諭德謝公墓誌銘

謝世家淞之臨海其先有諱長者始徙餘姚汝湖之四

門四門之從蓋當宋元之際長生明明生回一於公爲高祖曾祖諱某祖諱某世載令德厥有休問考諱瑩鯁直自將不阿權貴爲光祿署丞斥爲福建布政司都事又斥持其直終不變公諱某字某英睿夙成童貫比辭屬對響應無窮及長藻思逸發以禮舉於鄉屢上不中泐之士曰科目果不足以得人乎如某乃黜天順初知嘉定縣事錢塘蔣忠舉公經明行修會御史巡按蘇州者沮格不行或謂有關節可得則長揖去之曰如此得

仕非吾願也還舉於鄉年四十餘卒不第而其子遷德
器日開則束其經以授之曰吾已矣其爾乎成吾志也
遷發解浙江第一廷試天下第一歷陞詹事府少詹事
兼翰林院侍講學士直亮方巖隱然有公輔之望於天
下公以子貴初封翰林院修撰進封諭德配鄒氏由恭
人進封宜人公素負經濟及受封則絕意世故日以詩
酒自適於山雲海月之間無事不入城部使者過門談
論今古其爲利其爲害袞袞不竭聽者常聳如其言興

除民輒稱便公瑰偉軒豁不爲崖岬城府遇人輒盡或曰無乃太簡乎因自稱簡菴老人弘治四年鄒宜人卒詔有司治墳於縣之牛舉喪且免而公以六年四月二十六日卒於家壽六十三上又遣官祭以弘治七年某月日啓壙合葬宜人龍圖閣待制忠公浩之裔純德至行人無間言子男四長遷也次選迪遺女適上虞韓練孫男二正丕女二曾孫男女各一唯公宜試而室祉萃後人恩命敷賁終始哀榮可謂盛矣後祿之至方日富

而未艾也於戲則亦何必身自爲之銘曰

謝始申伯厥後孔碩相安將玄泝別支聯中葉或微望
於臨海餘姚來家繇公始祖儲祥縈仁幾三百年其後
將昌故晦其先俛俛封君華實有煒任我祖求舉步可
跂屢上不試天固尼之孰云尼之實將啓之紫閣言言
在帝左右啓沃敷陳維公有子孰積不施孰畊無穫錫
命追榮其報斯食其食不羸不諧其盛瑒幽眎昭皇有
後命

安人姚氏壙銘

安人姚氏少師榮國恭靖公祖也尚寶少卿諱繼父也
昭信校尉蘇州衛百戶史君宗廣其歸也生永樂辛卯
弘治辛亥壽八十有二矣一日顧其子鑑曰吾老矣其
爲吾治壙於某山之陰吾將從先公而休焉禮壙石有
志其即陳御醫公賢圖焉吾且欲見之公賢其子壻也
以銘屬予初少師以方外士佐太宗靖難竒謨秘畫載
在金匱配饗太宗爲時宗臣不娶以繼後繼太宗賜名

也命侍東宮學仁宗即位即拜尚寶少卿少師嘗不願
其家恩數過盛故位止此安人時侍京師年十七八矣
靖難遺事尚能道之始宗廣善畫嗜飲每畫必大醉自
以爲樂然安人每非之曰是乃公事邪後宗廣卒安人
持家教子率有矩度銘曰

赫赫榮公翊戴真主凌烟畫像配唐房杜翼翼符卿侍
學文華帷幄寵數擬漢陽都吳山之陽有高者墳後千
百年孰知其人符卿之子少師之孫

知將樂縣陳君墓誌銘

於戲古所謂循吏者其殆不可復見乎以吾所聞故將樂陳君其近之也予故誌其墓以告後之人初君以進士選知將樂大書廳事曰勤以補拙儉以助廉民有巖甲者前後持吏短長吏不敢動君至則執之瘐死獄中訟爲頓減將樂歲漕以給莆戍莆又漕以給將樂風濤湍悍覆溺相望君校其數相埒因各畱餉其境民兩便之其因事爲功類此時勸課均徭役抑豪強廣儲蓄已

乃興學校修城池驛傳倉廩道路至或捐俸爲之龜山
先生墓第不治君爲闢路若干置祭田十餘畝唐汀州
刺史穆公溺死見神於邑人君爲迎衣冠葬之春秋祀
不絕邑有巨峽民橋其上列屋櫛比淫雨暴漲民居且
浸橋亦危君爲禱於神水立退歲大旱君禱之又立雨
邑人以爲神部使者行縣睹其治曰樂邑其有賢人乎
雖鄰封有事輒以屬君光澤有疑獄歷數年不能決君
至一訊立得其情比歸光澤民遮道求識其面拜於馬

首而去城沙縣也績久弗成君爲物土賦庸民不知勞

使者上其績旌異之命下而君卒年四十有四君諱大

經字正之姓陳氏陳世家江西之德興宋南渡始家上

虞高祖某隱九峰山累辟不起曾祖倬祖敬輿通諸家

書考世英通尚書史記善楷法君生祖異之曰他日必

志經綸因名比長敦慎溫文初習禮已而苟通諸經以

詩占浙江解試登庚戌進士娶張氏某府太守巖之女

以某月日葬上虞某處弟南京大理評事大紀來請銘

銘曰

長吏庇氓或爲螻螟豈無異政非威伊名樂人熙熙君
我父母鄰邦曰嘻我乃無有三年之政百年之思顯刻
幽宮維後之貽

湖廣按察司副使蕭君墓誌銘

蕭世家蜀之巴縣君高祖諱某洪武中司永平府獄因
家焉今爲永平人祖諱本立考諱鳳君諱謙字有終由
進士授大理左寺評事進寺正擢山西按察僉事董屯

田諸務以憂去改浙江按察司副使督銀場諸務改湖
廣整勅辰沅兵備三年考績行至楊村卒弘治乙卯八
月二十日也壽五十七以某月日葬某處娶李氏後君
五日卒子男三淮武略將軍某副千戶漢國子生女三
長適千戶解璋次鄉貢進士張秉次千戶朱陞君居官
動遵三尺其在大理號能辯疑獄然求其出不求其入
理屯田屬邊多務出奇應猝軍以克濟建寧時有盜張
甚君躬詣其地梟其首亂者餘悉解縱遂平之鎮巡大

臣以聞詔兼分巡建寧道即其地立分司鎮之大軍之
討都勻也君統番漢軍策應事平蒙璽書錙弊之賜是
役也君冒藜箐觸炎瘴遂得疾君性仁孝在官聞父母
病即哀號不事事聞喪三日行官屬有不知者姪江與
漢年相差婚娶必先江而後漢采幣之禮眎漢有加焉
間同疾眎之亦必先江而後漢漢居京乞銘于其隣王
鏊銘曰

噫有終甫北方之傑理刑治兵所至則發仁孝溫溫吾

得諸鄰刻此銘章維以示信

恭人李氏墓誌銘

河南布政司左叅政王君名珣之妻故太子少保吏部尚書諱秉之女尚書致仕歸曹高標峻節海內仰之癸丑歲參政君之子崇文以進士選入翰林爲庶吉士今年春次子崇獻又以進士被選間嘗詢焉則皆尚書之甥也予以是知家學之淵源宅相之徵兆有不誣者久之崇文崇獻衰經泣詣予曰先恭人葬曹之水谷迄今

二十有二年今以繼母恭人黃之喪將祔而先恭人墓
未有刻先恭人之卒不肖兄弟幼其遺德不及知雖然
間則聞之先外祖母聞之伯叔母而先祖贈湖州府君
嘗稱以礪諸婦矣敢次爲狀以請予不得辭恭人高朗
淑慧言動有法其幼也尚書教諸子書恭人從傍聽之
即能了大義及歸王氏事湖州克孝克敬滂灑之奉捐
妝奩爲之參政在官時節饋獻踵道湖州之歿衣衾棺
槨皆恭人經紀之參政歸無憾焉育孤睦鄰賓接內外

禮意曲盡其卒也里有孤女以母之喪喪焉至於今諸
姑伯姊有會則曰恭人之賢也或至泣下者恭人生正
統庚寅以成化乙未正月二十六日卒年止三十有六
先封孺人繼封恭人參政子男八恭人出者四宗孺鄉
貢進士崇仁庠生崇文戶部主事崇獻庶吉士餘曰宗
儉崇讓崇有崇素恭人卒靈爽多異過祠不肅則恍若
見焉參政爲御史以事被逮曹人未之知也其主忽自
仆於地家人驚駭識之則被逮之日也豈其生而賢明

故死而有不亾者邪銘曰

在曹之陽其渙維谷誰墓於茲有拱者木冢宰其考夫
維岳伯八子宦學其儀濯濯維年不待迄於休成於赫
皇命象服是榮孰云不壽厥靈孔章納銘於幽以告不
亾

封孺人賈氏墓誌銘

封環縣知縣李君傑之妻秦州知州賓之母也姓賈氏
齎幼學於國子之退省堂賓寔來同硯席相好也間過

其家孺人喜曰若與斯人游乎其所謂益友也吾無憂
矣其後賓益壯交遊益廣有以文學相剗切者孺人忻
然爲治具或游謔無益者則澹然而退賓年二十三領
順天解久之知陝西環縣部使者上其績詔封傑如賓
官賈孺人已而賓擢知秦州未幾孺人卒賓奔喪還泣
請予銘於戲識范遠于寓中指黃裳于坐末昔之賢婦
類有之予何能爾而孺人之賢不可不識也賈氏世爲
保定蠡吾人父安唐府審理孺人卒以弘治丁巳四月

十八日葬以十月二十六日墓在東湖渠先塋之側子
男四長賓次宥國子生次寬次定女適進士何俊銘曰
慈且能教古有孟母猗嗟孺人克儀克守非卜其隣寔
占其友刻銘于幽以昭厥有

南京大理寺卿夏公墓誌銘

成化庚寅南京大理寺卿夏公致仕歸仁和後二十有
九年爲弘治己未卒于家春秋八十有八其子雞澤教
諭某來請銘曰公命也不得辭公諱時正字季爵夏姓

公生有異質讀書日記千言登乙丑進士第五人授刑

部河南司主事進郎中命理福建等處重獄時上杭民

饑盜且起不及以聞亟發倉賑給人比漢汲黯天順初

進大理寺丞以母老乞致仕不許請近地便養改南京

大理進少卿成化初改太常已又進南京大理寺卿被

命巡視江西黜貪濁者二百二十餘人草濫徭理庾賦

放免無名之稅十餘萬石勸民出粟七十餘萬賑饑民

二十三萬戶修築南昌城堤城賴復完長河洞民叛服

不常公單車詣巢穴曉以威德遂感泣歸順復䟽時弊
二十事以聞當道有不悅者遂三上章乞去得旨遂行
歸杭僦屋城陰之得勝里左右經史日以著述爲事藩
司爲建西湖書院於孤山復建和靖巢居閣以居公故
冢宰華亭錢公作海內耆英會公其一也夏氏世爲隴
右人唐上柱國封濟國公諱魯才始遷淞東慈溪之德
門鄉諱千秋者始遷定海考諱誠贈奉政大夫刑部郎
中始遷杭州仁和之三峰公娶沈氏封宜人子男四某

某孫男九曾孫男九以其年月日葬某原朝廷命官治其墳公所著有餘留藁三十五卷太常志十卷三禮儀略舉要各十卷深衣考十卷杭州志六十三卷禹貢詳節一卷蓋晚而好春秋曰聖經微旨諸儒亂之也乃爲春秋辯疑未脫藁而卒銘曰

勢塗轂擊爭捷騫誰其退者名乃聞好奇因以屈爲信吁嗟夫子仕稍屯丘壑一卧三十春渾鍠鑑耀肆厥文秩雖少抑名乃振刻之玄石期無泯

太醫院判陳君墓誌銘

陳之先自鳳陽來家於吳始祖良炳元同知太醫院事
高祖新齋郡醫學正曾祖本道世以醫學相傳吳有孟
景暘者精小兒醫本道館甥景暘所併得其傳祖彥斌
考仲和始皆專小兒醫君生七歲而孤少長發憤讀先
世書有聲吳下成化中詔取名醫郡以君名上君以太
孺人陸春秋高一詣院即乞歸久之太醫院言治小方
脈者少復起之君至甫一月被選入御藥房旋拜御醫

出入禁中調護諸王累奏竒効遂進院判今上即位以
例仍爲御醫三年進迪功郎入視東宮疾效加俸一級
丁巳歲上章乞歸上曰如陳某者何可使去左右而請
益堅上察其誠遂進院判致仕歸弘治庚申五月十三
日卒春秋六十有八君爲人不事表襮或侮之卒不較
少常誦學喫虧詩以自警直禁垣十有四年恭慎周密
累有白金之賜其爲醫究切脉理力護本原不求近效
不冑乘危射利貧者或反給之故其名籍甚而尤重於

士夫初名慶字公賢後以字行而更字公尚初娶仰氏
大理寺丞瞻之孫繼娶史氏蘇州衛百戶浩之女子三
憲寵宥皆世其業寵入御藥房亦有名京師孫男五女
一初君爲壽藏於黃山之陰予預爲之記比歸日經營
之未合也而君卒遂以明年月日葬焉銘曰

醫維仁術或益之疾孰唯其良乃及於國噫嘻公尚和
緩是同皇裔詵詵厥惟其功黃山之原生所治止既曰
治止尚安歸止

兵部武庫郎中吳君墓誌銘

弘治己未兵部武庫司郎中吳君汝礪以病告歸吳江
行至德州卒其弟瑩扶匱歸以庚申某月日葬大興圩
之先塋來乞銘君諱鋈汝礪字爲人好學攻文而尤有
詩才其爲詩苦思冥搜句妥字帖喜學唐人而時出新
意與人交不立崖岸當官勤慎而無隳事以是人愛重
焉意其必將遠到也汝礪占南畿解試三試禮部不中
冢宰三原王公巡撫江南間召與語因極陳民間諸弊

傳以經史指掌畫地衮衮不休王公驚焉贈之詩期其
大用君復以詩諷公公益竒之及登進士授兵部武選
主事進員外郎又進武庫郎中武選武庫皆劇司君自
儒者好從容嘯咏而終日抑首據案鈎考簿牘意不能
無少望又質弱多病醫者不審妄投之藥遂至不起嗚
呼豈亦其命然耶嘗以進士治大臣葬道聞母訃遂委事
徑歸當道者難之君曰安有舍親之喪而勤人之喪者
乎祖諱某考某封奉直大夫兵部武選司員外郎母李

氏贈宜人娶汝氏知南安府行敏之女封宜人子一人
曰重陽聘監察御史陸全卿女重陽方二歲煢煢可念
全卿曰吾與乃父有言矣遂許委禽焉銘曰

孔翠之文鵬鴉之鷲才也孰賢亦維其地嗟嗟汝礪壽
復不遐有文不耀有銜不抒埋鬱陰幽噫嘻奈何

承事郎徐君墓誌銘

徐裔出金華有三奇府君者當南宋時命一子留金華
一居舒之望江一居吳邑太湖之西洞庭山洞庭有原

隰陂池田園之利徐氏世擅其富世讀書好禮而不求仕入國朝子孫滋盛散居山中世以東南西北宅別之君所謂南宅者也其世系詳見故陳太史嗣初所撰先世墓文考諱震生子四人君於倫次最季而最愛於父雖不治舉業而好學不倦作七字詩往往可誦書有楷法兄弟既分煙君歎不忍去依其父以居終身焉父志所未至能先意承之及父母相繼沒寢苫柩側旦夕承事如生食必祭飲必奠朝設洗沐暮拂茵枕未嘗替于

初娶沈氏生二女子二曰縉曰紳王氏出西洞庭入國朝未有登第者君日夜督其子學縉果登順天鄉薦山人榮之君以弘治辛酉六月二十二日卒享年五十有二以某月日葬金鐸之原君體貌瓌碩襟宇夷曠意其必壽而止是縉方嚮用於時恩封有日矣而君不待於戲傷哉縉子子壻也爲之銘

昔之日俟我兮湖之麋今日送我兮江之涯風神猶在兮訃豈非有封不待兮可奈何嗟嗟命兮可奈何

欽定四庫全書



虞澤集

震澤集卷二十七

欽定四庫全書薈要卷一萬六千八百四十四

集部

震澤集卷二十八

明 王鏊 撰

誌銘

貴州按察司副使陳公墓誌銘

弘治十七年六月二日前貴州按察副使陳公卒十月
四日辛酉葬吳山之上金原壽六十有六初公按江西
有李都御史者與民爭水利積數年無敢決者公曰吾

請決之盡以其地歸諸民李謙之未發也久之公遷貴
州李時爲吏部考察見公名曰是陳某耶即泚筆抹去
之物論譁然宣慰使宋然率軍民抗疏留之不報公罷
歸吳中家具蕭然至粥書自給有司援天順詔例歲給
米五石日與學者講解經義有感觸輒發於詩佔畢呻
吟病咯血吟猶不止竟卒君諱琦字粹之大父諱某考
諱茂封奉政大夫江西按察司僉事陳之先本吳人以醫
辟居京師公少占順天鄉試成化丙戌登進士授南京

大理寺副歷寺正江西按察僉事貴州按察副使公在
官累辨疑獄廬陵有儒生夜過里人胡甲被殺官執胡
胡自誣服公曰豈有殺人而自置於門者訊之則儒生
有仇知其夜適胡也殺之胡得釋劇盜數十人爲曹白
畫標掠無禁公出令獲一人者賞若干縱其酋厚遇之
乃得悉其巢穴掩捕立盡清戎御史大煽酷虐蔓引平
民公爭之不得乃出理所分道民悉自首實御史誣執
二百餘家悉縱歸農比御史去民手瓦石胥擊之而爲

歌謠以頌公公所至興學獎士見韋素有文行折節下
之負權勢者視之如無竟以是罷娶吳氏繼邢氏子
年始十二女適烏程縣學生嚴統銘曰

噫嘻冷菴唯義之耽惠文客客孔允且直官誑名振孰
云我貧我貧我安講道以哦於戲逝矣傷如之何

福建布政司左參政姜公墓誌銘

公姜姓諱昂字恒頰生而端重介特不苟言笑數歲刻
礪讀書成化辛酉占應天鄉試明年登進士第出知棗

強一意愛民凡所決遣皆自以不寃門無呵卒獄無滯囚

三年召試監察御史時方士李孜省得幸公率同列疏
論之命杖於午門外以親老乞改南京河南道出理福
建戎籍擢知河南府值歲大旱公至則雨隨之洛人抃
舞每晨吏白事退終日閉閣觀書鞭箠懸不用時母夫
人年八十以懷土屬疾疏乞近郡便養不許疏復再上
三上至乞降府佐或教授它日除邊遠自効乃改知寧
波寧波聞公至同官皆減去輿馬華飾俳優雜劇不一

陳於前日本人貢過郡望公迎戰六年復以母老歸養
進福建布政司左參政不起且上疏乞終養母卒服闋
部使者奏起之而公以某年月日卒某年月日葬郡城
之官山公於取予尤不苟在官日買肉少許奉母自食
蔬菜子弟學書不得用官紙筆非歲首未嘗燕客不受
人饋貽亦未嘗餽貽於人權要請託一切報罷以是人
多不悅而亦不能毀也姜故汴人扈宋南渡家崇明之
西沙元時徙崑山之惠安鄉今爲太倉州人高祖諱仲

和元海運千戶曾祖諱源祖諱箎考諱敏贈文林郎南
京河南道監察御史母曹氏封太孺人子男二長龍中
應天甲子鄉試次淮女三孫男一女二銘曰

抑抑姜侯維行之揭矚然不緇爲彼玉雪皇假近郡汝
其予守色養以終萬鍾奚有東海洋洋終卧不起於戲
姜侯可謂君子

通議大夫工部右侍郎談公墓誌銘

公談姓諱倫字本彝其先有仕宋爲博士博士生宗遂

宗遂自開封扈宋南渡家吳興復遷上海族日蕃大曾

祖諱季芳始以族大爲憇痛自抑損散財積書人謂之

癡國初諸巨族皆謫戍人始服其識祖諱節考諱景瞻

皆贈通議大夫工部右侍郎公長身豐頤瑩然玉立景

泰丁丑登進士觀政吏部時鹽山王忠肅爲冢宰風岸

孤峭意輕南士見公瞿然曰南方有此人耶因授驗封

主事甫一年擢員外又擢郎中公性開朗又善承忠肅

意忠肅愛之英廟每召見忠肅輒以公隨上問之忠肅

以公名對曰臣老矣於聖諭恐有遺忘此郎代臣志之
且其人可信也上因欲大用之忠肅謂公年少資淺他
日用之未晚久之丁母淑人憂服闋至京則濟南尹公
爲冢宰補虞衡司三載擢應天府丞鳳陽大水尹京者不
敢以聞公自署其奏是歲詔免秋糧數萬進尹應天改順
天會軍興橫索民車以千數公許以百兩不可倍之不可
再倍之又不可乃具以聞詔以百兩與之自是軍士無
敢橫進工部右侍郎筦易州新政搜逋抉隱剗削奸蠹

歲得羨餘若干萬會南昌人李孜省以左道倖尹公子
龍被逮尹公以是去公亦隨之初公受知忠肅忠肅之
病也日侍湯藥于左右忠肅臨終以公託崔尹兩亞卿
兩亞卿亦自才之故公往來三家如家人父子時萬文康
在內閣有憾於尹因孜省媒蘖醞釀以成其獄士出尹
公門及山東者盡逐之朝班爲空尹公之門無敢闖焉
公於尹最厚其行也又往餞之故及今上登極公道昭
宣孜省伏誅謫逐者多召還而公竟不起弘治甲子某

月日也年七十五明年乙丑九月葬先塋之東淑人王氏張氏祔公無子以弟之子田後初公家居歲遣人起居尹公於山東忠肅之卒也祀之別室崔公歿亦如之尹公亦如之蓋其篤於所事如此於呼公之才識固遠到器也不幸屢爲當道諸公所知或推或輓卒以顛殞是獨何哉其亦可慨也已銘曰

九輓莫前一擠而顛其曷爲然退處而年追天之施公尚何怨

廣東按察使趙君墓誌銘

成化辛丑春禮部會試天下士吳江趙君栗夫名在第一刻其程文傳播中外名聲大起時年甫二十餘尋登進士上第授刑部主事歷負外郎郎中浙江按察司副使進廣東按察使蒞任甫越月卒年四十有九君諱寬栗夫字生而白晢纖弱若不勝衣而警敏絕人自少讀書五行俱下其于舉業殊不經意下筆即超邁老輩皆推服之及有官益肆力學問自經史以及諸子百家無

不淹貫爲文雄渾秀整行草亦清潤時刑曹同官華亭
陳一夔崑山秦廷贄天台王存敬皆能詩四人相得歡
甚更相倡和時吳文定公在翰林良辰佳節四人輒相
過從予時亦往來公所多相賡和君才尤贍下筆數百
言衆皆驚其捷服其工吏事初非所長在刑曹久律例
通究曉析訟至立解獄無寃滯及董浙江學政能推所
學以變其習士無諛聞狹見之陋凡經指授爲文皆有
程度不以權勢動搖有所軒輕高下遇人坦率不事表

裸人以是愛而重之曾祖諱銘黃巖曲史祖諱瑛湖州
梅溪局大使考賜累封刑部郎中母沈氏封宜人梅溪
善星數君之幼也以爲必貴特愛之南京國子學正莫
君某竒之歸以其女子男二禧邑庠生餘幼禧卜以正
德元年葬君於吳橫山靈石峯之麓莫宜人祔銘曰
孔翠祥鷓其文既騫騏驎服轅中道忽踈始誰啓之卒
誰尼之已乎粟夫愛莫起之

雲南按察使進階中奉大夫張公墓誌銘

雲南按察司按察使張公諱翥字汝振世爲蘇之長洲人曾祖諱進浙江諸暨知縣祖諱滄國初以人才徵未用卒考諱樞贈奉政大夫南京刑部郎中妣陸氏封太宜人公登天順丁丑進士授工部都水司主事改虞衡司又改南京刑部山東司歷員外郎郎中出知江西南昌府進河南布政司治參政雲南按察使致仕以子約貴進階正議大夫勲資治尹今上登極以詔恩進中奉大夫正德丙寅冬十月二十九日卒於家春秋七十有

七明年五月己未葬邑之金芝嶺配吳氏累封淑人子
男二長約工部營繕司郎中次蒙貞女三壻爲南京太
常寺典簿郭忱鄉貢進士顏掾府學生傅義孫男女各
四公清慎守法矍然若不自持而見義卓然不惑始至
南昌即理寃獄出之民大悅高安有毛姓世豪於鄉縱
火殺人亡命吏不敢問公發之竟置重典民又大悚有
中貴乘傳搜括民間竒玩勢張甚郡縣望風迎拜且以鹽
抑配於民而以庫銀給之至南昌公曰民吾民也庫朝

廷之庫也誰敢干之吾將以聞於上中貴見公不可奪
乃稍自戢時所至民被其擾獨南昌晏然雲南諸夷爭
襲賄賂公行公一切禁絕年甫六十以母老懇乞致仕
以歸公天性簡儉家故富且貴矣而自奉有人所不能
堪歸吳掃軌閉門客至則清話終日澹如也居官所至
能舉其職而南昌之政尤偉故予特詳焉銘曰

張公揭揭所至則發昔在南昌或獬而猖肆螫吾民乃
以身當位方日融倏解而旋有子而才有孫有年寵秩

有加亦又何嗟

通議大夫南京都察院左副都御史陳公墓誌銘
弘治乙丑冬南京都察院左副都御史陳公致仕歸吳
明年正德元年九月十日卒于家又明年其子鑑來京
因請予誌其墓於戲往年吳文定公不祿今茲公又逝
平生交游存者其幾其尚忍銘之耶其尚忍不銘耶公
諱瑀字玉汝世家長洲之陳湖大父諱子富考諱孟善
皆贈通議大夫南京都察院左副都御史祖妣吳氏母

錢氏累贈淑人公積官自翰林庶吉士授兵科給事中
歷刑科左給事中大理寺左右寺丞左右少卿南京都
察院左僉都御史左副都御史階通議大夫嘗以給事
閱寶湖貴邊儲以少卿出按湖藩刑獄以都御史檢周
府莊田又按吉府獄事前後董舟師於江上享年六十
有七墓在隆池山之原葬之日爲丁卯歲十二月三日
配嚴氏封淑人子男四鎡鑰鍵鏃女二孫八濤淳津沔漢
泓洵洳曾孫四公體貌脩整不類吳產少入郡庠已頗

然出其輩類成化戊子占應天解額戊戌今少師李公
同考會試得其文知其爲奇士也置之高等遂被選爲
庶吉士時文定公在翰林聲稱籍甚公初與同席硯遂
屈已師之相與劇切爲古文詞公質若重遲而思致獨
遠不肯爲尋常熟爛語始務奇倔卒造平澹時輩推之
爲言官隨事獻納務持大體不沽激訐名妖僧繼曉事
覺法司當以常刑公言先王之制爲奇技淫巧以蕩上
心者殺法司當非是於是曉竟坐棄市尚書何喬新等

皆被詰責待罪有中官搏近臣於殿陛間公劾之兩皆
坐黜又劾寧陽侯陳輔諸不法事卒奪其爵在大理以
儒術飾吏事平反唯允初周府莊田與民田相淆累歲
爭不決時河南諸當道意在民也公往履畝具實以聞
詔歸之府於是始忤當道意其董舟師也適劇賊施天
泰出沒海上大肆標掠東南騷動公引兵會魏都御史
紳於海口賊已斂氣仍諭以朝廷威信向背禍福賊遂
挺身來歸東南晏然衆方多其功久之海上餘孽復相

煽動言者乃咎公與魏不當受其降會今上初言路大
開言者紛然猶尚以當道故也公不辯遂引疾乞致仕
詔許馳傳以歸明年即其家賜緋袍白金以平賊功云
於戲公之檢田也所持者衷其受降也所存者信而每
不爲議者所與夫衷與信非所獲罪也公又何歎乎其
亦命而已矣於人何尤焉銘曰

誰謂吳遠而多文學公在諫垣其儀濯濯乃平邦刑乃
持邦憲出入踐更吏以儒緣世方疾驅吾獨委蛇吾自

吾信嘒嘒則那退處而休孰怨以尤琢詞立石以昭於
幽

封孺人徐氏墓誌銘

孺人徐姓裔出吳之天平山成化中長鄉之稅邑大夫
禮焉一邑之事多倚以集諱熿者其考也水東之陳封
文林郎翰林院編修名輿者其歸也登丙辰進士被選
入翰林爲庶吉士授編修侍今上經筵爲講官修先皇
帝實錄克纂修曰霽入粟於官授冠帶曰震授八品散


官曰雲爲邑庠生曰雷其子也適遠述遂其孫也正統
壬戌八月四日其生正德三年五月八日其卒之日也
胥臺山之青銅塢其葬之地戊辰十月葬之日也天性
貞靜而明慧讀書通大義知楷法事舅姑以恪慎凡烹
調紉綴澣濯率躬爲之不以委人歸陳值家中微尺累
寸積遂大其家甲於一方課諸子以學口授孝經唐詩
指解字義敷說故事使知所慕法霽入翰林之三年則
拜孺人封號冠帔朱袍居常罕御蓋以布素終身焉其

行也是其可書者矣霽方以文學嚮用於時所以褒顯其親將又有異等焉銘曰

詩詠葛覃服乃無斃鴟鳩均平唯內之則于嗟孺人天
平之華來嬪湖汭亦大其家勤而後安母有多子象服
在躬承祀有煒胡不百年享此繁祉刻銘幽宮以永厥
終



震澤集卷二十八



總校官庶吉士 臣張能照

校對官檢討 臣王鍾健

謄錄貢生 臣蘇曰柄

欽定四庫全書薈要

集部

震澤集卷

二十九
三十

詳校官侯補通政司經歷臣郭祚熾



欽定四庫全書蒼要卷一萬六千八百四十五

集部

震澤集卷二十九

明 王鏊 撰

誌銘

太子太保吏部尚書贈特進光祿大夫左柱國太師謚端毅王公墓誌銘

國家有宿德重望之臣曰王公諱恕字宗貫仕至太子太保吏部尚書年七十八致仕今上即位遣行人即其



家存問而公卒於家年九十有四上爲輟視朝一日諭祭者九仍命工部治葬事贈特進光祿大夫左柱國太師謚端毅朝之公卿罔不嗟悼已又羨焉謂公祿位名壽終始俱全近古所未有也公可謂一代偉人矣王世家陝西三原縣公生而魁偉高岸音吐如鐘見者異之正統戊辰登進士選入翰林爲庶吉士授大理評事歷左寺副出知揚州府擢江西右布政使轉河南左布政使成化初進都察院右副都御史撫南陽荆襄流民

丁內艱會荆襄盜起特起復公征勦遂勅巡撫河南進左副都御史改南京刑部左侍郎巡視河防又改南京戶部左侍郎所至有異政然猶未甚爲人知也會雲南夷獠爲梗改公都察院左副都御史巡撫其地時鎮守內臣私市外夷誅求無厭人莫敢問公劾之其下郭英懼而自盡沒其寶石於官筭械送其下數人于京且勸上不寶異物凡花木禽獸寶玩宜一切拒絕有駕帖下郎中鍾蕃所公言舊例駕帖下諸司司禮監印刑科號皇門

諸司關防今皆無之何以爲信設駕帖有賜死者其人將何如死之恐孤臣節不死恐違君命又言昔交趾鎮守非人致一方陷沒騰衝啟釁致麓賊叛逆今日之事殆又甚焉在雲南九閱月疏二十上由是直聲動天下進都察院右都御史又改南京都察院參贊守備機務提督巡江進兵部尚書仍參贊同事者忌之改巡撫南直隸公以近年貢獻太多所在騷擾因言古之明王有投珠抵璧卻千里馬焚雉頭裘者非不知珍玩之可愛

也恐因而妨政害事所以投之抵之焚之卻之以固結人心爲宗社計也乞崇恭儉爲天下先凡織造官一切取迴珍玩竒貨令四方無來獻中官王敬乘傳東南搜索竒玩所至驚懼公言當此凶歲謂宜遣使賑濟而乃橫求玩好昔唐太宗遣使涼州諷李大亮獻名鷹明皇令益州織半臂背子捍撥鏤牙大亮與蘇頲不奉詔臣敢不效之又具言其失人心損國體傷和氣而召災沴上乃召戒敬久之敬等俱收捕下獄同惡王臣斬於市中

外稱快謂公有回天之力仍轉南京兵部尚書叅贊機
務刑部員外郎林俊以諫建永昌寺下獄經歷張黻掇
之亦下獄公言二人志在盡忠而得罪恐人自此以言
爲諱設有奸邪誤國誰復爲朝廷言者俄有旨令致仕
公怡然就道孝宗在東宮則聞公名即位召爲吏部尚
書旋加太子太保公在吏部裁抑僥倖褒獎名節甄拔
淹滯中貴無敢以私干劉文穆在內閣每有所軒輊公
亦不屈守備蔣琮與南京科道相訐奏科道多得貶黜

琮自如公言宮中府中俱爲一體陟罰臧否不宜異同
知州劉槩御史李興以忤文穆下獄公力辯之得減死
內旨以通政司經歷高祿爲本司叅議公言祿出自科
目自可遠到而越次超陞恐非所以愛之也唯以天下
之官待天下之士勿以親戚妨公義事乃止時有建白
多謂業已行矣公言天下事設未得其當雖十易之不
爲害若謂已行無及則古之納諫如流者豈皆未行乎
公遇事輒言有不合即引疾求退上每溫詔留之執政

有不悅謂其好名者太醫院判劉文泰因誣奏公公疏
辨下文泰獄鞫問事遂白而公求去益力詔允之命乘
傳以歸有司給役米既歸日優游園林讀書著述不輟言
者每欲起公不果以正德三年四月二十日卒明年月
日葬某原公在揚州屢析疑獄歲飢且疫發倉廩給醫
藥全活不可勝紀襄陽賊平首帥欲縱兵搜山因公言
而止東南大水土庶咸望公奏蠲歲額公獨持其議以
軍國之計重也然所免各郡亦且數十萬而人莫之知

舊例應天鎮江太平寧國廣德官田減半徵而民田全免久之民田多歸豪家官田多歸下戶公乃爲之損益官田量減其耗民田稍增之公私便焉公曾祖諱彥成祖唯真考仲智皆贈光祿大夫柱國太子太保吏部尚書曾祖妣某氏祖妣張氏妣周氏累贈一品夫人公先娶蓋氏繼張氏俱累贈一品夫人文氏封一品夫人子男五承怙都督府經歷承祿義官承祥順天府通判承禋義官承裕吏科給事中女二孫男十二統綬基堊節簡

潜璿環輅輦輦女九曾孫男四安邦安民安世安國
女二公所著有石渠意見四卷拾遺二卷玩易意見一
卷詩文十卷歷代諫議錄一百二十卷漕河通志二十
卷奏議若干卷銘曰

國有正氣曰唯忠義忠義斯存國勢乃尊侃侃王公奮
自三原歷事五朝正色危言其言維何別邪與正邪正
既分國是斯定逆鱗屢犯犯且弗傷唯公之誠唯先皇
之明帝曰老臣國之耆耆卹典榮名有加於舊公如汲

黯逆亂寢謀公如裴度邪佞所仇公雖亡矣神豈云邈
上騎箕尾下壯河嶽刻碑詔後唯昧之覺

封太安人楊氏墓誌銘

太安人楊氏世爲崑山農家故封翰林院修撰顧公諱
某之側室實生今翰林院侍講承直郎昂臣弘治十八
年秋天子上兩宮徽號推恩近臣因進封太安人正德
四年十月二日以疾卒明年九月七日葬吳縣潭山之
新阡年七十有四初修撰春秋高正室吳安人相之性

嚴少可太安人承事唯恭唯慎奉上撫下調護左右蔭庇內外固有違言者或非意所干一切含忍引分推誠終不見忿厲之色生昂臣甚愛之意常遠之人不知其爲愛也及昂臣舉進士賜第一甲第一人及第未幾遂受封命遠近稱慶以爲殊遇太安人獨愀然若不懌蓋念吳之弗獲是典而已獨被其榮也子男一即昂臣孫男一履方孫女二說者謂春秋之義母以子貴夫豈獨以貴又以之賢焉蓋觀其子之立可以知其能教也若

太安人者有子如此可不謂賢乎銘曰
邈矣丹山孰云其高有雛生焉其文九苞彼其崩施孰
之敢擬有如不信徵諸魯史

伯兄警之墓誌銘

伯兄諱銘字警之贈光祿大夫柱國少傅兼太子太傅
戶部尚書武英殿大學士諱伯英寔曾祖初贈資善大
夫戶部尚書文淵閣大學士繼贈光祿大夫柱國少傅
兼太子太傅武英殿大學士諱達寔祖前知光化縣累

贈光祿大夫柱國少傅兼太子太傅戶部尚書武英殿
大學士諱朝用寔考兄生而修長瓌碩沈默端厚雖在
卒遽言貌紆徐無異平日少嘗隨任光化相道後先人
謂先少傅之宜于光人非獨內德茂也抑其子有助焉
年未艾歸卧湖山間滅跡城市鏊立朝三十年州縣不
知其有兄也及鏊在內閣人或曰弟當要路不可因是
媒進耶兄曰吾嘗勸吾弟唯公唯正苟以吾故撓其節
雖貴不願也近時貴家多以勢持州縣短長侵牟齊民

以廣其田園高其第宅或勸可傲之兄曰吾嘗勸吾弟
唯廉唯慎苟以吾故傷其潔雖富不願也其於聲色玩
好博奕遊戲一無所畱意王氏自宋家太湖之包山世
以忠厚相承而近世亦不能無少變也兄蓋有前人之
風焉而今不可見矣悲夫生正統癸亥九月二十三日
以正德五年五月十七日卒年六十有八初娶鄭氏繼
孟氏子男四寵宰蚤卒延質延學皆工舉業孫四有周
有勻有方有親以六年十二月二十六日葬蔣塢先塋

之側銘曰

兄其曷歸從先少傅暨先夫人尚安其故

中憲大夫雲南按察副使致仕朱公墓誌銘

朱之先系出唐孝友先生仁軌宋有兵部郎中貫與丞相杜祁公游所謂睢陽五老者也五傳至直秘閣子榮稚年遭亂南奔始家吳之常熟直閣生實錄院修撰大有徙家吳城又三世爲征東儒學提舉德潤有盛名于元是爲公之高祖曾祖吉皇戶科給事中以直言被旌

遷湖廣按察司僉事召爲中書舍人始徙崑山祖永安
考夏皆隱居教授考以公貴贈監察御史公諱文字天
昭自幼超穎迥出輩流游郡庠部使者程校藝業輒爲
首冠舉于鄉輒不利成化丁酉年三十有二始占南畿
鄉試甲辰登進士第公初治詩已乃改治春秋又改治
易治易未三年遂登第士流服其敏弘治庚戌授雲南
道監察御史出按兩廣戎籍凡理戎籍例以搜括隱慝
多寡爲殿最益其任者率以酷烈爲名公在兩廣獨持

平不苛而稽審有法民一言出口洞燭顛末雖斷歸戎籍退無怨言巡按福建風裁整肅衆謂得御史體魏都御史富林副使俊移疾家居咸奏起之時公私殫屈國計無所出而鎮守死者貨財鉅萬輒既于羣小會福建鎮守陳道死公乃籍其數以聞冀可佐公帑之乏詔不從是後鎮守死御史不得復預權貴者始忌之屯田故有額而隱占于奸氓歲久漫不可考公至湖廣則許民自首不究切之或得業已久則輸稅而不奪其業民見

公明信率詣官首實公爲政雖若嚴峻而每出于平恕閩
有吳甲治海船商乙以市外蕃咸坐死公曰甲造舟而未
嘗市蕃乙市蕃而舟非所製得減死其他冤獄尤多所平
反政聲流聞法當遷秩上官有不悅者署其考爲才力
不及久之改雲南公曰尚可仕乎遂上疏乞致仕時國
法方峻人爲公危之公不顧卒得旨允居官幾三十年
公私無纖毫過差權門要路雖舊與連未嘗一言自通
人有德公者寓書當道薦進公知之即還其書不達曰

吾豈可自售也尤善論古今成敗能以辯博濟其議往
往屈人于廣坐之中予與交幾四十年偉其博重其廉
且守而獨疑其過于警拔不虞乃以不及沮于時銓鑒
者其獨謂何物論所以至今不厭者也公以正德六年
三月二十八日卒春秋六十有八七年二月二十一日
葬吳縣陽抱山之先塋恭人王氏祔恭人工部右侍郎
贈尚書永和之孫大理評事汝賢之女賢明貞淑鄉邦
稱之大理無子館公于家子男六長希周恭人出賜第

一甲第一人及第今爲翰林侍讀以學行聞于時次希
召希韓希富希呂希馮女四孫男二女三公所著有宋
石稿涉覽比事臆見雜錄若干卷藏于家銘曰

不溷其明不刊其方持其頽頽不與時當屏居優游不
怨以尤嗟允君子胡不少留何以傳之刻在碑幽

通議大夫都察院右副都御史林公墓誌銘

正德戊辰三月九日巡撫雲南都察院右副都御史林
公卒于家歲辛未其子有孚始以進士言于朝曰唯國

家於大臣之終具有恤典載在令甲近逆瑾柄國實隳大典先臣之歿且三年尚在淺土今朝廷事復舊章臣敢以聞有旨命有司治塋域仍命官諭祭如故事於是

有孚乞歸以壬申十二月六日葬公于邑之紫帽山先塋之右過吳乞銘于予予於公同年友也知公特深公諱普長字元甫後以字行而更字秉仁成化甲午占福建鄉薦明年賜同進士出身時尹恭簡爲冢宰識而異之曰雅粹端重宜居侍從之列奏授工科給事中先是

言官有以言得罪者中外以言爲諱臺諫徒取充位公獨以獻替爲志乃言今進士科限三甲恐不能盡天下

才宜如宋制增置五甲其四甲五甲皆授以學校之職庶人才不遺而師儒之職可重疏上忤旨時已詔公冊封占城乃罷不遣而遣他使後他使有海禍或以罪戍邊人謂公有神明之助焉久之有旨召恭簡至內曰蕭顯等六人皆外叙公名預焉以母憂獨免服闋改南京禮科以憂去弘治中仍署本科未幾擢都給事中時儲

貳尚虛公言宜早建以定國本土魯蕃以獅子來獻公

言宜卻之以明明主不貴遠物時議且復用汪直王越
公言二人投之尚未遠可復用耶餘若抑倖進慎選舉
恤災患節財用溥恩宥優畿民皆累累爲上言之癸丑
擢山東布政司左叅政時齊魯旱甚所司方於歲額外
多斂以備賑濟公曰與其多取以濟民孰若寡取之爲
濟廣且均也會營德府妃葬大治瑩域公不可王令承
奉長史諭之又令諸藩臬諭之又面諭之終不可乃易

人董之擢雲南右布政使未浹月轉陝西左布政使時
方飢饉重以師旅公轉餉維時師以克濟擢都察院右
副都御史巡撫四川值寇作公嚴督將領平之有襲衣
白金之賜蜀歲轉餉松潘路出蕃中蕃人劫掠邀利官
吏又緣以侵牟蜀人病之公設方畧禁貪緝橫其弊幾
絕而議者顧不便焉甲子改命巡撫貴州旋又改雲南
以積勞賜誥進通議大夫推封三代且錄子有恒爲胄
學生公時已病痿在告疏三上始得旨給驛以歸逾二

年卒春秋六十有四公長身美髯眉目朗秀襟度冲粹

不見畛域而執守堅定不以利搖勢奪家居敦行孝友

置九牧祭田緝譜牒復孝義堂居官潔廉明慎所至人

懷之凡汲引人才人未嘗知寮友嘗被誣以身家保之

竟亦不使之知也林世家閩之莆田世稱九牧林氏公

爲邵州蘊之後奕世有聞祖諱宏泰贈通議大夫都察

院右副都御史祖妣李氏贈淑人考諱良弼封徵仕郎

工科給事中贈通議大夫都察院右副都御史妣黃氏

贈淑人公娶陳氏督府經歷圭之女贈淑人繼孔氏宣
聖五十八代孫封淑人子男三有恒有章有孚女三孫
男五大魁大選大道大嚴大遂銘曰

端粹溫溫可望而親其仁不爽持議蹇蹇不隨以貶乃
全其方皇恩於赫賁于寗寗維後之慶

光祿大夫柱國少保兼太子太保刑部尚書閔公
墓誌銘

昔在孝宗朝其大司寇曰閔公諱珪字朝瑛其先有仕

宋爲將仕郎自汴來家湖州之烏程晟舍里六世祖德

淵歸安教諭曾祖諱性祖諱緩考諱節皆以公貴累贈

光祿大夫柱國太子太保刑部尚書曾祖妣袁氏祖妣

謝氏朱氏妣嚴氏皆贈一品夫人嚴夫人爲國初工部

尚書諱震直之孫尚書醇德懿行簡在高皇公之生也

人以爲有外祖之風焉天順甲申登進士選授山東道

監察御史屢劾大臣之不法者罷之成化六年擢江西

按察副使已而改廣東進按察使庾嶺介南雄南安間

二境爭田不決公方會勘衆忽噉呼爲變人勸公少辟
公不動徐爲處決令下兩境胥悅散去新會民嘯聚山
谷爲亂公出諭以大義貫其逋負遂安堵如故二十一
年江西南贛盜起擢公都察院右僉都御史巡撫江西
至則舉廉黜貪勸分薄賦且疏盜賊之作皆巨室是由
欲連坐之仍革豪右橫取之弊京宦由是多不悅會妖
人季孜省得倖因言公不勝任左遷廣西按察使弘治初
復公都御史巡撫畿甸經理儲備修濬城濠尋進刑部

侍郎四年以都御史總督兩廣軍務番禺瀧水柳慶平

樂彘獠相繼爲亂督其下討平之其討古田也都督馬

俊及參政馬鉉敗死時以致敗自俊公引咎自劾時議

又欲濟師公謂罪止首惡乃設重購緝之已而賊果自

縛以歸公又歸功於下安南使臣奏入貢道憑祥龍州

輒爲所梗詔下公處分公曰是亦各有罪焉乃行安南

毋得挾私貨行憑祥無得阻貢物二夷爭遂息公在兩

廣通行鹽之地而軍儲以濟立定順長官司而蠻人不

爲變八年進南京刑部尚書尋改左都御史掌都察院
事加太子少保十三年遷刑部尚書公前後在法司屢
治大獄皆會切情法加以仁恕樂工袁林以罪瘦死獄
中邏人以刑部郎中丁哲濫致之死也事連御史陳玉
下廷議時以事出中貴相顧莫敢發公獨擬如律及吏
徐珪以死辨捨寬并下獄深治公又執如初竟俱從末
減遼東都指揮張天祥襲殺虜爲功大理少卿吳一貫
當其罪死會天祥死于獄孝宗大怒親鞫于廷欲置一

貫重辟公與都御史戴珊進曰一貫推按不實罪當徒
上怒不解公力諍曰法如是足也一貫罪止貶官宣撫
逮妖人李道明蔓延百餘人巡撫者欲張大以爲功公
獻罪止道明餘悉縱免正德初逆瑾用事公遂請老詔
允仍加少保乘驛以歸輿皂祿米有加焉猶以公德厚
故也辛未十月十五日以疾卒以某年月日葬橫山之
原壽八十有二夫人王氏累受封誥秩階一品先二歲
卒子二閭聞女一孫男七宜勤宜勛宜勵宜勅宜助宜

勩宜効宜勤督府都事勩勵國子生女四曾孫男六女
三公少讀書于廂房之東楹偶徙而西忽驟雨震霆破
其楹及出巡徑深山甫及岸而梁陷殆若有神相之者
公少則以韓魏公自期其後敎歷中外焯著勩烈雍容
廊廟不見運動而天下陰受其賜信魏公之流亞歟及
功成身退壽考榮名孫曾滿前福履之盛又近世所鮮
儷也予與公同朝久知公行爲詳其葬也聞以墓銘來

請銘曰

於皇九葉時明之隆間于兩社有若閔公閔公之庸奮
自南服内外省臺出入南北帝曰俞哉汝作予士明于
五刑以弼予治唯帝好生唯公慎德滲漉薰蒸以長王
國上方耆之有孽其間辭榮來歸烏程之山人亦有言
刑官罔後昔也咎陶不與三后公持邦刑有歲有年福
履優游名德具完雲曾繩繩考終大耄太史刻銘維後
之詔

石田先生墓誌銘

有吳隱君子沈姓諱周啓南字而世稱之唯曰石田先生先生世家長洲之相城里魯大父良琛始闢田以大其家大父孟淵考恒吉皆不仕而以文雅稱先生風格潔修眉目娟秀外標朗潤內蘊精明書過目即能默識凡經傳子史百家山經地志醫方卜筮稗官傳奇下至浮屠老子亦皆涉其要掇其英華發爲詩雄深辨博開闔變化神怪疊出讀者傾耳駭目其體裁初規白傳忽變眉山或兼放翁而先生所得要自有不凡近者書法涪

翁道勁竒倨間作繪事峯巒煙雲波濤花卉鳥獸蟲魚
莫不各極其態或草草點綴而意已足成輒自題其上
時稱二絕一時名人皆折節內交自部使者郡縣大夫
皆見賓禮搢紳東西行過吳及後學好事者日造其廬
而請焉相城居長洲之東偏其別業名有竹居每黎明門
未闢舟已塞乎其港矣先生固喜客至則相與譙笑咏
歌出古圖書器物摸撫品題酬對終日不厭間以事入
城必擇地之僻隩者潛焉好事者已物色之比至則屢

滿乎其戶外矣先生高致絕人而和易近物販夫牧豎持
帑來索不見難色或爲屬作求題以售亦樂然應之數年
來近自京師遠至閩浙川廣無不購求其蹟以爲珍玩風
流文翰照映一室其亦盛矣先生自景泰間已有重名汪
郡守澣欲舉應賢良不果王端毅公巡撫南畿尤重之延
問得失而先生終不及時政曰吾野人也於時事何知焉
然每聞時政得失則憂喜形于顏面人以是知先生非忘
世者初先生事親色養無違母張夫人以高壽終先生已

八十而孺慕毀瘠杖而後興弟病瘵終年與同臥起館嫠
妹撫孤姪皆有恩義尤喜獎掖後進有當其意者爲延譽
不已先生娶于陳生子曰雲鴻官崑山縣陰陽訓術早卒
庶子復孫履皆郡學生先生以正德四年八月二日卒壽
八十有三復相履治喪以壬申十二月二十一日葬相
城西牒字圩之原所著有石田稿石田文抄石田詠史補
忘客坐新聞沈氏交游錄若干卷獨其詩已大行於時文徵
明曰石田之名世莫不知知之深者誰乎宜莫如吳文定

公及公闡其潛而掩諸幽則唯公在予諾焉銘曰

或隆之位而慳其受或敘之秩而侈其有較是二者吾
其奚取嗟嗟石翁掇衆遺棄發爲渾鯨震驚一世彼榮
而庸磨滅皆是相城之墟湖水沄沄於戲邈矣我懷其
人

亡妹故葉元在室人墓誌銘

先少傅所生子女六人而先夫人出者四伯銘仲葵叔
銓與歸南濠葉氏妹也王氏世家太湖之東洞庭先少

傅嘗知襄之光化累贈光祿大夫柱國少傅兼太子太傅戶部尚書武英殿大學士先夫人始封孺人累贈一品夫人螯承乏內閣預聞政事葉之先以居積富元在之祖諱嘉善考諱文實皆隱吳之市門而有行義實始起其家葉之先亦家洞庭而元在之幼以穎敏聞故妹歸於葉生子一人曰森孫男二女一子妹嘗侍先少傅于光化及子歸自朝歲時來寧愉愉如也人謂吾妹生長紈綺不見其驕葉氏故富南濠尤以華麗相矜吾妹

居之不見其侈而賑卹單寒不見其嗇居家事父母敬也推之事舅姑著肅雝之美處兄弟和也推之待姻族成嫻睦之行性又開敏解事治內御外罔不稱宜故一時大家多中衰而森獨能持其家不替焉吾妹素無疾意其壽也而一病遽不起寔正德辛未五月十七日於戲衰門多豐哀酷繼纏前年哭元在今吾妹又繼之且年皆五十而止其可哀也夫其亦命也夫森以癸酉三月二十八日奉其柩葬橫山西倉塢祔元在兆銘曰

溫柔端嫗妹之良兮嬪于葉宗佐蒸嘗兮內外歸賢宜
壽康兮脩焉賈謝吁其傷兮

鄉貢進士吳文之母萬氏墓誌銘

正德丙子春三月丁酉孝子文之奉其母萬氏之柩葬
洞庭西金山之陳嶺萬諱齡祖金考文皆不仕子一即
文之女二壻陸完卜金孫絳其生爲景泰甲戌卒以正
德癸酉七月四日春秋六十比葬某志其墓詞曰

東洞庭之東有峰小而娟秀曰西金吳氏世家焉爲山

之鉅姓有諱侃者萬所歸也能戮力同心以勤家萬姓
婉婉而曉達世務力持門戶吉凶慶弔賓祭豐儉必式
下至米鹽細碎雞豚時藝亦罔不宜性慈愛而恕爲禮
或不酬曰無乃吾有未至者乎市物恒過予之曰無乃
有不得其直者乎嘗折券以業貧買棺以瘞死人以是
歸其仁能通孝經大義又能推之以孝其姑葛葛每稱
之於人母周孀居五十餘年以壽終哭之過哀酒肉不
御子諫之不聽竟以毀卒人以是歸其孝於戲其必將

有後乎文之才性絕人年二十擢應天解試高等聲振
遠邇功名可俯拾忽以疾沮疾愈且北上又以服沮天
固遲之以充其受大其發乎會將赫焉名於天下有恩
自天賁於茲阡嗟山之人毋或壞旃

皇甫成之墓誌銘

鄱陽丘公之知吾蘇也嘗妙選吳下文士得四人與其
弟霖游四人者長洲皇甫成之崑山朱天昭吳門徐廷
芸洞庭王鏊濟之也丘公好文學知人下士四人者亦樂

其相得日相游從講說相觀相勵明年乙未鏊及第八
翰林其後天昭登進士授監察御史廷芸亦薦於鄉獨
君八試應天皆不第弘治戊申有司貢入太學則病不
能行矣明年四月二十四日卒於家又明年十二月十
三日祔葬於邑之尹山鄉其子錄訃於鏊發書哭之慟
已乃曰吾知君者固宜錄則爲誌其墓曰君諱信字成
之皇甫姓少負竒氣議論偉然爲文章援筆數千言立
就作詩有警語尤工書法工拙肥瘦能隨人意鏊嘗作

詩未得書君代書之他日示鏊鏊不能辨也行師趙文敏楷師張即之以上逼於顏魯公瓌偉峭勁求者日填戶吳中公府學校齋坊多出其手鏊嘗評其書云竒峯矗起枯松倒生嘗患卞急以問於鏊鏊爲二語答之曰靜以勝躁理以勝忿君曰我知之矣扁其室曰韋庵自是含垢以忍其從善如此雖屢困塲屋而氣不衰與朋友交劇飲歌呼不見厓岸赴義如嗜欲治生教子皆有程度父病徹夜侍湯藥不懈居喪哀毀甚言及輒流涕

終喪亦然終其身無不然皇甫氏世家真定自宋南渡
來居長洲之孔聖里曾祖諱均祖諱璵考諱通其世系
詳見鏊所撰其先處士墓誌配彭氏子三金錄銓孫三
淞浚沖錄爲郡庠生未冠已負才名人謂君有後矣君
年十三則爲巡按御史眉山歐君所竒今冢宰三原王
公之巡撫吾蘇也日召與語亟對衆稱其才前廣信太
守淮陽金君見其文曰珠璣金玉莫可城量故兩廣巡
撫右都御史韓公亦曰皇甫子卿雲甘雨也卒時年四

十六銘曰

八戰於藝輒北以躡千里之足嗟不一試躡且復起君寔有子君墓吾銘以是慰耳

震澤集卷二十九

欽定四庫全書薈要卷一萬六千八百四十六

集部

震澤集卷三十

明 王鏊 撰

誌銘

南京刑部郎中進應天府丞中憲大夫張君墓誌
銘

昔宋之南遷也南軒張先生敬夫有子留松之上海上
海之張其稱蓋久元世有諱楷者仕為總督海運提舉

提舉生達之仍督海運生二子詢國初舉賢良知貴溪
縣諤仕至陝西僉事生復古通左氏春秋海寧教諭教
諭生述亦通春秋攻古文詞是生南京刑部郎中詔寔
惟君之考君諱某字某少承家學歲甲午占應天鄉試
丁未登進士授南京刑部主事進員外郎又進郎中弘
治中上疏乞致仕上嘉其恬退進應天府丞致仕居林下
值今上上兩宮徽號進階三品子鳴鳳以御史考最加
中憲大夫年七十某年月日卒君始為刑曹訥訥儒者

也一旦舍所業而事城旦書人且謂將不勝而君若素
習然雖老法家無以過之民有里嫗訟其子不孝者君
引其子責曰是非汝所由生耶語其母曰是非汝所生耶
胡爲乃爾反覆開譬以人倫之義皆感悔泣去龍江張
謙武斷豪猾持吏短長吏莫何問君寘之法龍江人驩
譁相慶歲丙辰鳴鳳登進士君喜曰人言刑官無後吾
嘗懼焉訊鞫每以恕求之曰庶免乎此其徵矣及鳴鳳
官南臺旦暮定省樂也君一日出郊鳴鳳自郊歸值之

遽下馬立道周輩類御史疾馳去君乃歎曰吾老矣安

得復與兒子輩爭衡哉自是有去志未幾逆瑾柄國孛

戮天下士君獨超然不預人尤高之君性澹泊敦厚不

事表襮處兄弟宗族朋友罔不以義下至臧獲亦得其

懽心然人有過則面折之人知其非苟然者未第時嘗

夢人語之曰汝名先狀元覺而思曰吾其殆乎第豈有

登狀元先者及會試榜出名在十五而鉛山費宏十六

是年宏廷試第一始大神之其幼也嘗夢神示府丞字

莫測及致仕而有府丞之命人生得喪其果有前定者
耶娶尹氏封恭人繼瞿氏封恭人子男二鳴鳳尹出鳴
鶴瞿出鳴鳳於逆瑾時以言獲譴罷歸五年瑾敗始遷
湖廣按察僉事又進沅辰兵備副使以丁丑十二月葬
某處予考丁未會試得君丙辰又得鳴鳳鳴鳳因是遠
涉太湖來請銘銘曰

誰謂刑官而多無後惟允惟明福流斯厚世方競趨獨
屏幽居不羸其祉施于孫子

故河南監察御史程君墓誌銘

孝宗皇帝御天下憂憫元元體貌大臣而於臺諫尤所
優假於是言官多得盡言而言之得體剴切而可憚婉
曲而可思明白而可以感動人主者亦無幾人若休寧
程君良用其所謂得進言之體者也君諱材初以進士
授閩之汀州府推官汀俗故號頑獷君至方毅明察一
時獄訟不之守而之推守以是嘆之巡按御史胡華入
守言每含怒以待有因法當流胡欲寘之死君據法以

諍胡曰我不知法耶胡怒益甚君辨不已久之胡忽自
悟曰推官言是也不然幾誤殺一人後有大獄必召君
議巡郡必挾君以往文事武備悉以委之且舉君爲八
閩循吏之首召授河南道監察御史即上疏劾大臣貪
耄者二人時長憲者謂試御史不得遽言事不與實授
君亦不顧曰試御史獨非言官耶會考京職給事中吳
舜王蓋被黜二人蓋嘗劾冢宰馬公者君遂上疏言大
臣天子之腹心言官天子之耳目任腹心而廢耳目可

乎願留舜蓋黜臣等之緘默者未幾又疏九庫出納之弊蠹政爲剗甲子秋始實授御史往福建清戎伍至天津值中貴進時鮮者暴橫不法上疏劾之因請上節貢賦以安民生至淮安又上弘大綱舉萬目以隆治體任將帥以重邊防謹諡議以昭公道累數千言今上初政又上十事一曰君心萬事之本聖學進修之本朝廷四方之本部院諸司之本衣食生民之本禮樂教化之本賢才致治之本聽納求諫之本將帥攻守之本內治外

攘之本所歷地方災傷又上奏曰陛下登極之初災異
數見願反身修德信用忠賢自宮闈以及百執事皆禁
絕奢侈與逸遊戲玩之具與夫不正之人無益之事可
緩之賦一切罷去皆人所難言者又嘗薦人才如王綸
可尚御藥許進宜本兵柄陸完之勤廉林俊之養素自
重陳茂烈張詡夏鍤潘府之恬退後多爲名士君自以
齋出於程而生於新安故一意程朱之學嘗曰今世人
才之不逮古者科目害之也朝廷設科以取士士由科

目以進身豈利祿之謂哉所至輒引諸生以講明性理之學雖簿書鼓還而手不釋卷居大父母喪不用僧尼道士至今家以爲法時巡按缺負君兼領其事又兼查理文卷軍器諸務填委君殫精竭慮遂以憂勞成疾疾草召所屬語之曰吾爲言官不能舉其職死有餘媿死之日其勿斂賻賵以重吾罪古者冠帶不送死其爲吾易深衣以殮時有族叔在浙西求一訣君曰爲謝吾叔察院豈私見所耶叔大哭而去時正德丙寅九月十七

日也年止四十有一以某年月日葬某處君娶方氏子
男二曰默曰然程之先出自周伯休父世望廣平而新
安有程自元譚公始公七世祖元三公自槐塘出繼大
呈村五世祖誠公由大呈遷岑山今爲岑山人大父示
瑞考祚君修髯偉儀觀抱負落落不凡與張芝戴銑爲
友砥礪以名節必欲追古人及之不肯隨世碌碌以就
功名官內臺一年所上十餘疏疏皆當今急務非掇拾細
故以塞責亦不爲矯訐以求名惜中道忽踈然跡其所

樹立亦足襮白於天下雖不至公卿未爲不遇也假而位至卿相終老默默以去視今所得何如哉君之葬十餘年其子然舉應天鄉試高等始以狀來泣請銘曰先君累不第公考應天則在選癸丑復不第公考會試則又在選豈生能知之死不能表之乎冢宰陸公又以書來曰程君屬纊忍死以囑完曰必得公銘此言不可忘也余不能辭銘曰

我思古人伊漢之誼策懷治安志實經濟遇君之明卒

乃不試唯光與禹三事周旋爲國者者一辭莫宜校是
二者孰夭孰延於乎良用可以無怨

明故通議大夫都察院右副都御史徐公墓誌銘

正德乙亥正月二十九日都察院右副都御史徐公卒
于家訃聞上命有司治葬事丁丑三月日葬堯峰山之
先塋友人大學士王某刻其碑曰公諱源字仲山世家
吳長洲尹山之瓜涇祖孝質贈通議大夫都察院右副
都御史考諒初封工部都水主事贈武選郎中加贈通

議大夫都察院右副都御史公少則好學工文有名吳
下成化乙酉占南畿鄉薦乙未登進士第授工部都水
主事理徂徠等處泉源改兵部武庫司主事歷職方員
外郎武選郎中廣東布政司左參政浙江右布政湖廣
左布政都察院右副都御史巡撫山東初武選最號劇
司公至洗心自誓一意奉公權貴請囑戒門者一切勿
通而籍其姓名若將行罰者囑賄遂絕時天下武功爵幾
二十萬坐耗天下絕嗣者以疎遠襲公奏宗派許襲傍

支者一切罷之大草冗濫舊例以罪亡者落職公謂罪有輕重以笞杖而革其職不已甚乎人又樂其寬大司馬馬公甚委重之廣東勦雲桂猺獞公督糧水陸並進觸瘴癘深入師以克濟山東歲饑公與刑部何侍郎分行賑濟割臨清倉米八萬有奇以補歲漕之數明年徵償公奏民賴拯給稍蘇而又遽征之何殊弗給詔免與民涇王就封於沂以水涸將由陸之國民爲騷動公檄所司姑緩之亟發卒濬河水旋至坦然之國公私無擾

公凡三蒞場屋浙藩拆卷多儒士御史意欲有所前却
公曰科場所取者文即通榜儒士何傷山東歛銀將於
鹿鳴宴贖士公曰方筮仕而示以利非爲政之體乃已
嘗代祀岳鎮東海齋之夕應時澍雨闕里文廟成有白
金文綺之賜累疏乞致仕詔馳驛以歸公溫粹寬仁人
稱長者而臨事執守堅定雖當官蒞政未嘗一日去書
不觀文章博雅尤喜爲詩力去近世尖新之習書有米
家父子風配朱氏封安人贈宜人加贈淑人子男三柒

例授蘇州衛指揮同知先卒棠國子生襲郡庠生女三
孫男三勲烈熊曾孫一余與公交四十餘年公弟南昌
經府澄狀公行來請銘銘曰

端粹溫文以富厥有施于有政亦既克守毀或求全非
我所取銘于山阿噫奈公何

嘉議大夫南京工部右侍郎沈公墓誌銘

宜興沈氏其先蓋出梁隱侯約之後世家吳興曾祖源
澤元季避仇來居宜興之黃瀆洪武中舉遺才拜代州

同知祖德榮考養以公貴贈通議大夫都察院右副都御史公天順己卯占應天鄉薦庚辰登進士第授南京戶部主事歷負外郎郎中陝西布政司參議福建參議參政廣西江西左右布政使都察院右副都御史遂進南京工部右侍郎乞致仕家居十餘年年七十三卒葬大潮山之陽公在陝分守商洛流逋新歸者詔復三年而有司征役如故公劾其罪募工甃其城免屢築之患福建銀鑛所司有額外之賦公案之落職御史欲翻案

出之公執不可御史怏怏無奈卒從之廣西鎮守刻戍
糧衆聚欲敗變羣噪扣官署燔民舍撫之不聽公命土
兵擒殺十餘人乃定當是時微公幾爲亂琉球使入貢
竊尚方禁工縱淫媒夷人易變所過莫敢問涉江西境
公曰若縱之歸得無爲外夷笑乎以計擒之鄖陽七府
諸司皆創建吏緣爲奸公至則黜贓吏三四輩民無田
者聽開墾荒埜仍復其租三年得熟田數千頃訪校官
有學行者令諸生相從講學教軍士採材木陶甌甃甃

其城十二里闢城南教場悉樹以柳以時演武其間至
今萬柳成陰鄔人飲于江以故多癯疾公始命鑿十井
於城中且造浮橋以通樊城免風濤之患以均州泰和
宮觀香銀糴穀賑饑有司至今遵行之其在湖廣奏定
各藩府歲祿又驗丁糧多寡定徭役輕重長沙武岳諸
郡逋負至二百餘萬有司征求百方民終不能輸公奏
宜命官檢實有所解縱庶民得沾恩而官事亦辦詔即
委公蠲民五十餘萬折徵餘萬官民兩利焉湖南宣撫

宣慰諸司交惡或請兵勦之公言蠻夷相攻不可以疲
中國其後諸夷亦自解兵平漢鎮遠地邊貴州而懸屬
湖廣所司奏欲割屬貴州爲便公言犬牙相制自祖宗
深意豈可輕變唯征調詞訟則屬之貴南京歲治宮室
城池戰船上供器用動以萬計大氐奸人乾沒其間費
鉅而工窳公性善會計躬自物色品節多寡日月省試
又謹倉庫出納之數諸小無所容其奸興訛造謗公知
事不可爲遂求去矣初公爲負外監倉監稅亦以嚴察

羣小不便侍郎章綸入浮議因考察劾公物議紛然時

葉文莊公爲吏侍上命與都給事毛弘同蒞之乃白公

之直前任怨自小官則然矣公孝弟清修好學予嘗評

其詩有魏晉風楷書得魯公筆意往年至宜興公約予

游張公善卷二洞又至太湖山則已自塋冢壙營域饗

祀堂室池沼橋梁碑亭綽楔秩然嚴整余曰跡公治行

即不諱朝廷當命官治何預爲公曰生無功於國死敢

煩官家即是亦可知其賢矣初娶某氏繼某氏皆封某

人子男二某某銘曰

抑抑沈侯潤澤而稟自爲郎官所至則發四臨大藩御
史中丞南少司空名位具登古亦有言清而容物吾豈
不容耻是咕囁超然出之道不我欺戔戔太潮公手所
治千秋萬年尚安在茲

故中憲大夫知温州府事文公繼室吳安人墓誌
銘

弘治某年中憲大夫知浙江温州府事文公卒于官返葬

吳縣梅村之原安人祁氏祔後二十年爲正德己卯九月某日繼室安人吳氏卒其年十二月十有三日祔葬祁安人之右初大夫之葬安人曰其爲我穿穴氛傍吾且從公於茲時未四十也至是竟如其志吳世吳人安人考諱清仕終永康縣學教諭母顧獨以二女居大夫時知永嘉喪其配祁安人聞永康之季則賢也乃委禽焉安人通孝經小學嫻於禮度時大夫諸子皆幼安人煦濡抱負察其燠寒飢飽瘡疴有若所生雖諸子亦不

知其非所生也隨官博平丞南太僕總持內政賓客祭祀之奉下至米鹽筐篋巨細固有遺漏而內外之限尤嚴大夫以是無內顧憂及官温州單舸之任比疾始迎安人以往未幾大夫不祿諸子在吳舍歛殯莫皆合儀法已則闔廨舍約減獲葦無敢濫出入悉籍圖史及官府簿書扁鐫以須其子之至郡人歸賜甚腆子却之安人曰是無忝乃父矣歸官即謝膏沐屏處一室雖親姻罕覩其面大夫之子三曰徵靜徵明祁出也以文學世

其家徵明雖未第名已徹海內每秋試主司以不得徵
明爲憾而徵明未嘗以不第爲懟也庶子室孫男八女
三嗚呼近世風化之壞俗有不堪說者予甚傷焉若安
人者獨居十年冰蘖之操不磷不緇可不謂賢乎君子
以是知大夫之教行於家也銘曰

詩詠栢舟志矢弗他鳴鳩飼子其愛無頗我懷伊人寧
復有之洵美安人維其似之梅原之封於今有耀噫嘻
末俗尚克是傲

亞中大夫雲南按察司副使賀公墓誌銘

雲南按察副使賀公諱元忠字澤民其先自宋南渡來
家吳包山之陽曾祖孟安祖文昌世有隱德考廉以易
學魁應天解試歷官闕學訓福建按察知事以剛直不

能隨時告歸授徒吳中今吳中易學最盛其淵源盖有
自云公得家學之秘成化辛酉占解試高等壬辰登進
士授行人司行人擢江西道監察御史巡視漕河河道
爲通出按廣西風裁凜然剔奸振滯黜汚崇良名聲大

振當道者多才之而亦有不悅者乃除河南按察司僉事以憂去改僉雲南按察司撫夷勦寇茂著勲績鎮守黔國公巡撫巡按僉舉公資望不當尚滯卑官遂進按察副使兵備金齒騰衝時木邦孟養舉兵相攻累歲不解公躬冒嵐瘴諭以威德事且就緒而固以病乞歸矣帳下千人以金贖不受夷人爲作郤金亭以旌其廉云公歸林下凡二十四年歲乙丑詔進亞中大夫正德丙子八月十日以疾卒春秋七十有八其年十二月廿有

六日葬山之西塢配鄒恭人祔子男六泰以進士歷官御史直言被謫叙遷南京刑部郎晉郡庠生良漸與孚孫男二安節安世公爲人操持堅定面目嚴冷在道時獨持憲紀輩類御史抑首媿媿不敢出一語親舊或有囑則厲聲曰吾知有國法不知有他他日有言言事當有跡則又厲聲曰御史以風聞言事必俟發而後舉則焉用御史爲家居久矣雖子弟不敢媠見泰以御史按閩中還侍立左右惴惴如也近世仕者多崇第宅廣田

園以侈相高公少能以其家富迄老所居狹隘卑陋終不肯覆一瓦增一塵曰無爲子孫累也冠服敝舊飲饌菲薄能甘之雖宴享賓客亦不肯隨俗奢靡值伎樂必望望然去之出入坐一小航人不知其嘗有官也於乎其可謂篤於自信不爲流俗所變者耶銘曰
去古逾遠侈日滋滔滔末俗止者誰嗟允夫子矜獨持毅然不惑行不隨後有考不在于斯

光祿大夫柱國太子太保戶部尚書武英殿大學

士贈太傅文僖靳公墓誌銘

正德庚辰八月七日太子太保戶部尚書武英殿大學士靳公卒未葬武宗南巡還師過鎮江幸其第親臨其喪撫柩嗟悼者久之今上入繼大統訃聞爲輟朝一日諭祭者九贈太傅諡文僖遣進士朱紘治葬事其子懋仁卜以嘉靖元年二月二十五日葬公于其邑長山之原某於公爲寮友又姻家也知公爲深故爲之銘公諱某字某靳之先世家廬州元季避亂徙鎮江之丹陽曾

祖諱某祖諱榮不仕考諱瑜温州府經歷有遺愛在温
皆以公貴贈光祿大夫柱國太子太保戶部尚書武英
殿大學士曾祖妣姜祖妣吳妣范皆贈一品夫人始温
州年踰五十無子范夫人憂之陰爲置媵於側室温州
見之驚曰是何爲者吾老矣何可復累人亟遣歸其家
俄而范夫人就館以天順甲申十二月二十日生公於
温州之官舍少長穎悟捷出時廣東副憲丁玉夫號深
理學公從之游又從今致仕少傅楊公游其學益邃以

博弘治己酉舉應天鄉試第一庚戌會試第二廷試第一
甲第三及第授翰林院編修弘治丙辰皇太子將出閣講
詔選正人以端國本其選特慎翰林舊學多不預戶部尚
書侶公以公名上遂兼司經局校書未數日也宮僚環侍
皇太子獨指公問左右曰非靳先生耶固已目屬之孝廟
幸講所尤加獎異有文綺玳帶之賜又進春坊中允會典
成進春坊左諭德翰林院侍講公每侍講筵敷奏雍容儀
觀修偉重瞳屢回武宗登極公以舊學進太常寺少卿翰

林院侍講充日講是歲范夫人卒京邸給驛歸治葬服闋
還職尋掌翰林院事進禮部侍郎時逆瑾盜政常因事諷
公密書京官殿最以進公不從銜之時翰林多外遷公亦
左遷爲光祿卿已乃復舊改吏部又進兼翰林院學士管
誥勅掌詹事府事仍充日講官又進禮部尚書甲戌遂進
文淵閣大學士叅預機務已又進太子太保戶部尚書武
英殿大學士公在內閣屬時多事居常色憂不滿容與少
傅楊公等同心輔政時上講武禁中視朝稀晚相與上言

謹視朝之節以示勤政嚴宮闈之禁以備不虞儲嗣未定
海內寒心中外無敢言者又相與勸上擇宗藩之近且賢
者置之京師以係海內人心竢皇子誕育仍歸藩邸皆人
所難言者丁丑上以郊祀畢將遂田南海子公時臥病即
上疏言方今國本未定中外危疑飢饉薦臻四方多儆鑿
輿豈可輕動遂乞告詔遣御醫視疾中使存問又上疏乞
致仕不許時禮部以會試請考試官詔以屬公公曰吾
儕所以報國者在此力疾以往事竣復三上疏乞去上

以公忠勤體國方切倚毗屢詔慰留公詞益切乃許之
賜勅給驛以歸有司月給祿米輿皂且蔭子懋仁爲中
書舍人公雖得謝而憂世之心不釋居常邑邑不解顏
人莫測其所以越二年疽發背卒壽五十有七在翰林
時同考會試主考順天鄉試者一考會試者再授庶吉
士者再造就爲多西夏賊平賜賀功牌一尋又賜麒麟
斗牛服玉帶罪人家屬蟒衣三襲及歸又賜襲衣白金
楮幣公豐夷溫粹可望而親平居端默臨事則侃侃無

所避爲文根極理要病世之學者多趨華靡教人必先
經學嘗曰涵養須用敬進學則在致知此虞廷相傳心
法也嘗典試崇雅黜浮力變士習家居斥去紈綺侈麗
之物作師儉堂以示子孫事親色養無違居喪致毀而
動遵儀禮自袒括至祥禫皆有儀注以爲後式晚以故
第遜其族兄作室城南建祠堂於正寢之東置祭田祭
器作惇叙堂以合族草去近世焚楮之弊其好古力行
如此夫人某氏故雲南左布政使某之女繼夫人夏氏

金氏子男一即懋仁女六長適故禮部侍郎費公之子
太學生街次聘江陰夏載次聘某次聘宜興少師徐文
靖公之曾孫坤次聘鎮江衛指揮使陳可貞之子次幼
於乎公生平力學不懈學必以濂洛爲宗不可謂不純
且正也際遇兩朝致位政府不可謂不遇也用未久而
歸歸未久而卒其所蘊有未能盡試者乎天下顧不能
無惜焉銘曰

翼翼文僖奮自南服翔于詞林秀動睿目遭際恭陵瞻

馬顧只不難正朕而况朕子遂加校書隨侍春宮朝經
暮史風議雍容儲宮南面從龍以登秘閣巖巖心膂股
肱惟是師往海內承式乃匪其榮而憂而惕丹宸之箴
祁招之愔甲觀之虛寔縈臣心得告來歸爰弛其憂憂
之不釋疾遂不瘳鑿輿東臨弗蒞弗被上錄舊臣恩命
稠疊用雖不究禮數則崇刻詞幽墟以貢初終

勤上人塔銘

釋迦最上一乘正法眼藏吾不得而知也而知其必由

戒以入戒生定定生慧不由戒而求佛如煮砂作糜無

有是義顧今之學佛者從其道而好違其戒故吾於勤

上人有取焉而友之其歿也其徒道全方瑞來求銘吾

曰吾心許之久矣上人諱智勤本沈氏子而幼養於陸

伯良氏既冠陸將室之喞然弃去山之法海鼓林也從

師復雜髮焉苦行精修慨然有忘身求道之志遂渡浙

江登壇受戒具遊天台過石梁者三至普陀然其一指

觀音現像焉禮育王塔求見舍利陟天目禮高峰塔又

然其一指塔爲放光遊武當禮玄武至五臺禮文殊方
其篤於所詣杖錫重趺炎風漲海蛟龍變怪不知其爲毒
也冰崖雪磴繩橋懸渡不知其爲阨也神遊鬼墟蟲蛇
獅象不知其爲害也既而曰即心是佛何遠之求乃歸
俞塢初塢有寺曰興福久第不治里人迎復與上人居
焉檀越爭施遂芟榛翳剝巖巒山門佛殿齋廊庖廄罔
不彫新與法海抗矣後乃孫其居與其徒自營退居安
坐其間日誦法華積成一藏夫以阿難之趨悟也猶有

登伽之惑上人少空色相戒體無毀杯渡之神怪也不
廢無礙之肉上人老味禪悅戒行罔缺年八十餘顏色
精瑩步履如飛人曰其真有得耶正德八年五月忽示
疾辟穀者五十日儼然而化春秋八十九僧臘六十有
奇命其徒曰留此四大勿用茶毗其年九月十七日葬
俞塢之岡去寺百武銘曰

像教西來被于震旦南宗北宗始合而散末乃益離或
縱而誕棄其巨筏祁登彼岸於勤上人獨精戒律徧禮

名山誓往兜率斷指忘身歸命文佛苦行精專八十九年隻履西歸悲動人天林屋之東有俞惟塢層構莊嚴師所營者千載皈依尚來歸也

延質壙銘

吾兄安隱四子伯寵秀文不幸短命死仲宰繼死所恃者質與學皆能成立亦且有子矣延質年三十有六正德六年十二月二十日又忽死於乎吾兄之賢而夭其嗣吾姪之才而不克永其年天可問耶初質年十七八

穎異拔出輦類落筆動千言翩翩有乃叔之風吾心以爲是子也脫穎三千之場搏扶九萬之海蓋無難者已而屢試南畿不利久之乃稍歛其英華余怪之方欲振起之則未也會安隱不祿葬有日質適病不能興質以父葬不能親塋心殊迫甚期愈近心逾迫病愈加或貽之成藥翼速已服之暴下不止卒於乎其命耶其可哀也已妻葉氏子有周有方女二初寵妻張氏早寡無子煢煢守志不渝葉憐之有無共之相守如姊妹十年十

月廿四日張死今年六月廿六日葉亦死三喪並以丁
丑閏十二月十一日葬蔣塢祖塋之東偏其重可哀也
已銘曰

汝之不幸耶吾宗之不競耶汝之才耶而止斯耶

震澤集卷三十



總校官庶吉士臣張能照

校對官檢討臣王鍾健

膳錄貢生臣蘇曰柄

膳錄監生臣葉椿